



## Lleisiau dros Newid Cymru - Papur Briffio

### Etholiadau Llywodraeth Leol 2012

Bwriedir cynnal etholiadau llywodraeth leol yng Nghymru ar **3<sup>ydd</sup> Mai 2012** - byddwch yn pleidleisio am eich Cyngorwyr Sir ar eich prif gyngor unedol yn ogystal â'ch Cyngorwyr Tref/Cymuned. Mae'r wybodaeth hon yn ymwneud ag etholiadau i'ch prif gyngor unedol. Mae ganddynt rôl bwysig i'w chwarae wrth gynrychioli pobl leol, arwain y gymuned leol a chyflenwi gwasanaethau lleol allweddol fel addysg, gwasanaethau cymdeithasol, tai, trafnidiaeth, llyfrgelloedd, hamdden, gwastraff, cynllunio, ailgylchu a gwasanaethau amgylcheddol. Mae grwpiau trydydd sector a llywodraeth leol yng Nghymru yn rhannu diddordeb yn lles yr ardaloedd lle maent yn gweithio ac wrth rymuso pobl leol i wneud gwahaniaeth cadarnhaol i'w cymunedau. Ceir nifer o enghreifftiau o weithio mewn partneriaeth rhwng y sector a llywodraeth leol a chynghorau lleol yw un o arianwyr gwaith y trydydd sector.

Cynhelir yr etholiadau hyn bob 4 blynedd a byddant yn etholiadau cyngor llawn gyda chystadleuaeth ar gyfer pob sedd (yn wahanol i rai ardaloedd eraill y DU lle caiff naill ai traean neu hanner y cyngor ei ailethol yn fwy rheolaidd).

Mae rheolaeth wleidyddol y 22 awdurdod unedol yn amrywio o ardal i ardal. Ceir clymbleidiau a chynghreiriau (lle mae grwpiau gwleidyddol wedi uno); cynghorau a reolir yn syml gan blaid y mwyafrif; ardaloedd a reolir gan grŵp o bobl Annibynnol; ardaloedd a reolir gan bleidiau lleiafrifol; ac ardaloedd lle ni cheir rheolaeth gyffredinol. Yn yr ardaloedd cyngor hyn, mae gan y cabinet neu fwrdd gydbwysedd gwleidyddol yn gymesur â'r nifer o seddi sydd gan bob grŵp gwleidyddol gwahanol. Ar hyn o bryd, mae gennym hyd yn oed un ardal, Cyngor Sir Ynys Môn, lle mae Llywodraeth Cymru wedi ymyrryd i benodi grŵp o 5 o Gomisiynwyr i redeg y Cyngor yn lle'r swyddog gweithredol gwleidyddol blaenorol (yn unol ag argymhellion yr Archwilydd Cyffredinol). Dyma'r tro cyntaf yn hanes llywodraeth leol Cymru i bwerau gweithredol unrhyw gyngor gael eu diarddel yn y ffordd hon a'r tebygolrwydd yw y bydd yn troi'n ôl at fodel gweithredol ar ôl etholiadau 2012. Y cyngor arall yng Nghymru sydd â threfn llywodraethu wahanol yw Gwynedd. Ar hyn o bryd mae ganddo fwrdd sydd â chydbwysedd gwleidyddol yn hytrach na model gweithredol yn seiliedig ar grŵp gwleidyddol yn dominyddu, ond bydd yn rhaid i hyn newid pan ddaw deddfwriaeth llywodraeth leol newydd i rym sy'n gwahardd y drefn hon.

Mae'n werth nodi nad yw gwleidyddiaeth pleidiau ar lefel leol o reidrydd yn trosi'n hawdd o'r blwch pleidleisio i reolaeth wleidyddol yn y cyngor. Nid yw'r ffaith bod cynghorydd yn ymwneud â phlaid wleidyddol arbennig, neu ddim yn ymwneud ag unrhyw blaid mewn gwirionedd, o reidrydd yn cael ei adlewyrchu yn y *grwpiau* gwleidyddol a gaiff eu creu o fewn llywodraeth leol - cyfansoddiad y grwpiau a sut maent yn ffurfio cysylltiadau gyda grwpiau eraill sy'n penderfynu ar y rheolaeth wleidyddol.

Er enghraifft, os caiff 35 o seddi mewn ardal gyngor eu hennill gan ymgeiswyr Annibynnol, efallai y byddant yn uno i ffurfio grŵp Annibynnol, neu eu rhannu i sawl carfan annibynnol, neu ymochri gydag un neu fwy o'r prif bleidiau gwleidyddol, neu benderfynu peidio ymochri gydag unrhyw grŵp. Neu beth am ystyried enghraifft go iawn o Gyngor Sir a Dinas Abertawe lle gallwch weld o'r tabl isod bod 22 o gynghorwyr y Democratiaid Rhyddfrydol wedi'u hethol. Os edrychwch ar wefan Abertawe a chwilio drwy eu grwpiau gwleidyddol cewch hyd i bum grŵp gwleidyddol gwahanol, ac nid oes un ohonynt yn grŵp y Democratiaid Rhyddfrydol. Yn hytrach mae ganddynt grŵp y Ceidwadwyr, grŵp Llafur, grŵp o'r enw Cymunedau Abertawe ac un arall o'r enw Gweinyddiaeth Abertawe a rhywun nad yw wedi ymochri ag unrhyw grŵp. Dim ond wrth edrych yn fanylach y sylwch ble mae'r holl Democratiaid Rhyddfrydol o fewn system y grwpiau. Maent oll yn rhan o grŵp Gweinyddiaeth Abertawe sydd â 36 o aelodau. Mae'r cynghorwyr eraill yn y grŵp hwnnw yn cynnwys 13 aelod Annibynnol a phleidiau bach a'r un cynghorydd Plaid Cymru, a'r grŵp hwn sydd â rheolaeth wleidyddol dros y cyngor mewn gwirionedd. Ond gwelwch hefyd o'r tabl isod bod 17 o gynghorwyr Annibynnol a chynghorwyr o bleidiau eraill yn Abertawe a hyd yn hyn rydym ond wedi cyfrif am 13 ohonynt, felly ble mae'r pedwar arall? O ran grwpiau, mae tri ohonynt wedi dod ynghyd i ffurfio grŵp Cymunedau Abertawe ac mae 1 yn parhau heb ymochri. Mae hyn yn egluro pam nad yw mor syml ag y gallai fod i bennu rheolaeth wleidyddol wrth ddim ond edrych ar niferoedd y pleidiau. Mae'n rhaid i chi edrych yn fanylach a dod o hyd i ba grwpiau gwleidyddol sydd wedi'u ffurfio.

Ar lefel wleidyddol leol, mae gwleidyddion Annibynnol yn hynod o ddylanwadol. Maent ganddynt fwy o seddi nag unrhyw un o'r 4 prif blaid wleidyddol arall yng Nghymru, ar hyn o bryd mae gan bobl Annibynnol tua 30% i'r seddi ac mae gan Lafur, Plaid Cymru, y Ceidwadwyr a'r Democratiaid Rhyddfrydol tua 27%, 16%, 13% a 12%, yn y drefn honno. Cymharwch hwn gyda'r darlun gwleidyddol ar gyfer Cynulliad Cenedlaethol Cymru lle nad oes un AC annibynnol ar hyn o bryd.

Dengys y tabl isod gyfansoddiad gwleidyddol presennol y 22 o awdurdodau unedol yng Nghymru a phwy sydd â rheolaeth wleidyddol. Fodd bynnag, nid yw'n dangos y grwpiau gwleidyddol, dim ond nifer y cynghorwyr sy'n gysylltiedig â'r prif bleidiau gwleidyddol neu sy'n Annibynnol neu Arall (pleidiau lleiafrifol).

Dim ond cipolwg a geir o'r wybodaeth hon, felly efallai na fydd yn gwbl gywir ar gyfer pob awdurdod ar bob adeg - gyda dros 1250 o gynghorwyr etholedig, mae'r darlun yn newid drwy'r amser wrth i swyddi gwag godi ac i wrthgilio gwleidyddol achlysurol ddigwydd. Mae nifer y cynghorwyr ym mhob cyngor yn amrywio yn ôl maint a phoblogaeth ardal y cyngor. Bydd gan bob ward cyngor o leiaf un cynghorydd etholedig, ond bydd gan y wardiau sydd â phoblogaeth fwy dwys mwy nag un cynghorydd (hyd at 3). I gael y wybodaeth ddiweddaraf am ardal llywodraeth leol benodol, ewch i'w gwefan lle gallwch ddod o hyd i wybodaeth am eu cyfansoddiad (sy'n rhoi manylion faint o gynghorwyr y dylent gael) a dylech fod yn gallu chwilio am wybodaeth am gynghorwyr fesul enw neu ward ar rai gwefannau gan grwpiau gwleidyddol. Cliciwch ar enw'r cyngor isod a bydd yn eich tywys i'w gwefan.

Cyngor	Nifer y Cynghorwyr	Pwy sy'n rheoli?	Ceidwadwyr	Llafur	Democratiaid Rhyddfrydol	Plaid Cymru	Annibynnol neu arall
<a href="#">Blaenau Gwent</a>	41	Dim Rheolaeth Gyffredinol	0	14	2	0	25
<a href="#">Pen-y-bont ar Ogwr</a>	54	Lleiafrif Llafur (a 3 o bobl annibynnol)	6	27	6	1	14
<a href="#">Caerffili</a>	72	Clymblaid Plaid Cymru a Lleiafrif Annibynnol	0	29	0	32	11
<a href="#">Caerdydd</a>	75	Clymblaid y Democratiaid Rhyddfrydol a Phlaid Cymru	17	13	35	7	3
<a href="#">Sir Gaerfyrddin</a>	74	Clymblaid Annibynnol a Llafur	0	11	0	30	33
<a href="#">Ceredigion</a>	42	Clymblaid Annibynnol a Llafur a'r Democratiaid Rhyddfrydol	0	1	9	20	12
<a href="#">Conwy</a>	58	Clymblaid Plaid Cymru ac Annibynnol a Llafur a'r Democratiaid Rhyddfrydol	19	7	5	14	13
<a href="#">Sir Ddinbych</a>	47	Dim Rheolaeth Gyffredinol	18	7	1	8	13
<a href="#">Sir y Fflint</a>	69	Clymblaid Annibynnol a'r Democratiaid Rhyddfrydol a Phlaid Cymru	9	22	9	1	28
<a href="#">Gwynedd</a>	75	Lleiafrif Plaid Cymru (ond bwrdd gwleidyddol gytbwys)	0	4	5	35	31
<a href="#">Sir Fôn</a>	40	5 Comisiynydd a benodwyd gan	0	5	0	8	27

		Lywodraeth Cymru					
<a href="#">Merthyr Tudful</a>	33	Clymblaid pob plaid dan arweiniad annibynnol	0	10	4	0	19
<a href="#">Sir Fynwy</a>	43	Y Ceidwadwyr	28	6	5	4	
<a href="#">Castell-nedd Port Talbot</a>	64	Llafur		39	3	11	11
<a href="#">Casnewydd</a>	50	Clymblaid y Ceidwadwyr a'r Democratiaid Rhyddfrydol	18	21	9	0	2
<a href="#">Sir Benfro</a>	60	Annibynnol	5	5	0	5	45
<a href="#">Powys</a>	71	Annibynnol	9	4	14	1	43
<a href="#">Rhondda Cynon Taf</a>	75	Llafur	1	48	3	18	5
<a href="#">Abertawe</a>	72	Clymblaid y Democratiaid Rhyddfrydol a Phlaid Cymru ac Annibynnol	5	27	22	1	17
<a href="#">Torfaen</a>	44	Llafur	5	18	2	3	16
<a href="#">Bro Morgannwg</a>	47	Y Ceidwadwyr	25	13	0	6	3
<a href="#">Wrecsam</a>	52	Clymblaid y Democratiaid Rhyddfrydol ac Annibynnol	5	12	12	4	19

Os hoffech ragor o wybodaeth am etholiadau Llywodraeth Leol Cymru 2012, mae CLILC wedi creu canllaw o'r enw [Cynghorydd 2012](#) ar gyfer ymgeiswyr posibl, sy'n cynnwys gwybodaeth am yr hyn mae cynghorwyr yn ei wneud, y taliadau maent yn eu derbyn a beth sydd angen iddynt wneud os oes ganddynt ddiddordeb sefyll mewn etholiad. Mae hefyd yn rhoi manylion cyswllt y pedair prif blaid wleidyddol:

Plaid Cymru: <http://www.plaidcymru.org>

Llafur Cymru: <http://www.welshlabour.org.uk>

Ceidwadwyr Cymru: <http://www.welshconservatives.com>

Democratiaid Rhyddfrydol Cymru: <http://www.welshlibdems.org.uk>

I gael rhestr lawn y pleidiau gwleidyddol cofrestredig, ewch i: [www.electoralcommission.org.uk](http://www.electoralcommission.org.uk)

Dylai hwn fod yn bwynt cyswllt cyntaf ar gyfer ymgeiswyr sydd â diddordeb i gynrychioli un o'r pleidiau gan fod angen iddynt gael tystysgrif awdurdodedig gan swyddog enwebu'r blaid, yn ogystal â chael eu henwebu'n swyddogol gan 10 etholwr cofrestredig yn y ward lle maent yn dymuno sefyll. Cofiwch mai pobl gyffredin sy'n sefyll mewn etholiadau yn eu cyngor lleol ac mae gan bobl sy'n ymwneud â grwpiau trydydd sector ddigonedd o brofiad o anghenion eu cymuned leol ac maent mewn sefyllfa ddelfrydol i ystyried dod yn gynghorydd lleol.

Gallai'r pleidiau gwleidyddol fod yn bwynt dechrau defnyddiol i bobl sy'n dymuno cysylltu ag ymgeiswyr at ddibenion llobio neu ddylanwadu, ond cofiwch fod nifer helaeth o ymgeiswyr yn Annibynnol o unrhyw gysylltiad gwleidyddol, felly mae llawer yn anoddach dod o hyd i ffyrdd o gysylltu â hwy. Yr ateb amlwg yw gofyn i'ch cyngor lleol am restr o ymgeiswyr wrth i'r etholiad nesáu.

Os hoffech ragor o wybodaeth am strwythur a swyddogaethau cynghorau lleol Cymru a sut i ddylanwadu arnynt, ewch i wefan [Lleisiau dros Newid Cymru](#) lle cewch afael ar ystod eang o wybodaeth ar sut mae gwleidyddiaeth yn gweithio a sut i ymgysylltu'n effeithiol â'r sawl sy'n llunio penderfyniadau.